

Wat ess eerns, un wat ess Spell?

JAUS BÄRBCHE

Et ess woehr: me könne joh heh ze Droosdoref kee „Je“ spreche. Deswäjen ess et och net weg heer met usse joldene Jäns, die me met joldene Jaffele esse. Ävve dat Bärbcche heesch wereklich Jau, met Jott, net met Je. Et wonnt en enem ahle, halevvefallene Kodde, wo en mieh wie de haleve Jefaache de Lehm erusluurt, esu jar de Rutte. Un ov et Daach noch dich ess, un de Dörre un de Fenste schleesse, bezwiefelen ich.

Wenn et ess erjendwo von Ärm-Löck-Jeroch heesch, moß ich emme an de Jaus denke.

Dat die ärem senn, velleech de äremste em janze Dörep, noch ärme wie de Dalmes Erpel un se Lüürche, ess jewess woehr. Me süht et.

De ahl Hennes ess dreckich, bes en de Schnäuze. Ene Krage hätte me Lääbe net am Hemp, de Maue senn opjeresse, froocht mich net, wie seng Botz uusüht. Me meent, se hätten noch Nuut an Flecklappe un Jaan. Et ahl Bärbcche hann ich em Kopp esu alt wie de Oma, bloß, dat kann jar net senn, weil senge Quass, de Peete, bei mir enn de Klass ess. Also kann et höchstens en de Vierzieje senn.

Ene Kamm hann se seche net. Dofüür hätt ävve senge Rock rondsöm Franniejele. Wat die an Huusroot hann, köhm bei uss net en de Möllemme, do dähte me uss vürrem Berekhüüesch Schängche schamme, dä de Möllkaar fiehrt.

Noch e Woort övve dä Peete: Ranze hätte kenne. Strömpf mierschdens och net. Wore seng Botz heerhätt, weeiß der liebe Himmel. Ich hann em att e paarmol ene Jreffel ode en Kladde geschenk, weile me leed deht. Noh längsdens zwei Daach ess et fott ode kapott. En däm stich et Äremsenn drenn, un wenn deren met Jold behängs.

Dobei dehte me richtig leed. Du kanns dich drei Stonnd bei enn setze – wenn deng Naas dat usshält – un met em rächene: drei un vier ess sebbe, hä kritt et net en de Kopp. Un ich hann iehr de janze Fibel usswendich jeliert wie der een Reih richtig jelässe. Wie kann e Mensch esu schwer vonn Kapee senn! Dobei ess se Vatte net ess en Kohrnühl, ävve och net wegge wie et drette Scholljohr jekomme.

Janz andesch ess dat mem jong Bärbcche. Dat ess e janz Jerööchdet. Dat ess att e

dotzend Johr uss de Scholl, met enem janz jooode Zeuchnis. Un en Muhl hätt dat am Kopp! Dat blicht kennem en Antwort schöldich.

Ävve arbeede jeht et net. Dofüür hätt et ene Quass em ierschde Scholljohr, alsu e Johr jöngge wie de Peete, senge Ohm.

Ene Mann hätt et Bärbcche net. Ode moß ich iehr saage, et ess net vehieroot? Wenn ich me nämlich dat Spell hüek övvelääje, wo ich och e bessje von Frau-löck vestonn un wennichstens weeiß, dat et zweielei Mensche jitt, dann hann ich noch e bessje vüür Ooge, dat dat Bärbcche jar net esu rääch en de Famellich däht passe, wat et Üüßere ahnjeht.

Et woor stramm jebaut un och halev-wäächs öörndlich ahnjedonn, wat et Üüßere ahnjeht un wat reen un janz bedögg. Ich vestonnt domols net esu rääch, woröm de Mama un de Oma un de Tant öff schannten un sähten: „Häss de jesehn, wat dat Jaus Bärbcche sich wedde opjetaakelt hätt?“ Ävve onge Optaakele konnt ich me noch nix vüürstelle.

Mir woor et Bärbcche uss enem andere Jronnd unheemlich: et hatt ierschdens janz ströhnich-kruuse Hoor, Fengenääjele wie Kralle un en Fratz von Jeseech, dat ich Angs vürrem hatt. Dozoh kohm seng Stemm, esu hatt un kraatschich, dat me emme ene Schodde övveret Liev leef. Zodäm hatt ich att en zwei-, dreimohl ze sehn krääch, wie et senge Jerd kammesöhlt hatt met allem, wat em jraad en de Fenger kohm, un met enem Jeschrei un Ussdröck, do woor de Italjääne Pette ene Kapuziene jäjen. Wenn ich de Mama noh däm eene ode andere Woort vom Bärbcche froogen däht, konnt se me mierschdens kenn Antwort jävve. Ich senn seche, dat seret och net woß.

Dä Jerd maht sich ävve nix druss. Mir kohm et vüür, äs wenne jar kenn Peng kenne däht. Ävve su jet von nitsch, wie der woor, joov et och em Dörep net mieh. Wat konnt der trädde, knuppe, petsche, kratze, speie! Dä hätt sich seche duudschlaage losse, wenne övvehaup kapottzekrieje woor, iehr datte jet jedonn hätt, woore kenn Loss drahn hatt.

Selbsreedend heele von Scholl net vell, vom Aufjaab maache övvehaup nix. Stroofarbeed, doh dähte drövv laache,

Jefaache – Gefächer

me Lääbe – mein Lebtag

kammesöhlt – verprügelt

e Jerööchdet – eine Raffinierte

die mahte att jar net. Un wenn et emm donoh woor drei-, viermohl de Woch, jimke iersch jar net en de Scholl ode hooch einfach wedde avv.

Ich weesß net, wie öff datte von de Pollezei jehollt wuurd un en de Scholl jeschleef, met Jebröll, datteret bes an de Klevstrooß hüüre konns. Nötze dächt dat nix.

Dann kohme dem Lehre Puff en de Häng. Ovv dä ene joode Lehre woor, weesß ich net, ich hann en net jehatt. Hä dächt öff en de Backe petsche un jink mem Stock fließich öm. Et heesch, hä wöör streng. Ävve beim Jerd woor et, äs wenn de met de Fuuß dorech de Kelledeck hättis jonn wolle. Nohm Petsche sträcke dem Lehre Puff de Zong eruss, bei de ierschde Klöpp, övve de Bank jelaht, troote dem Lehre jäjen et Schennbeen, iehr dat der et ierschde-

jeääch – geeggt



mohl zoh hatt jeschlaage. Hä maht Fise-matentche, an die mir net ens daachten, wemme noch esu en Wuut op ene Lehre hatten.

Nur eent kohm beim Puff wennich vüür: datte de Scholl schwänze dächt. Et joov Pänz, die sähten: „Dä ess beim Puff extra heh, weile dän noch mieh ärjere kann wie die andere Lehre.“

Dat woor e Deel woor, die andere lehten dä Jerd mööchslichs links lieje. Eenes joodenn Daachs hatte nu dä Lehre Puff esu en de Wut jebraht, dat dä sich wahl seleve net mieh kann. Un wie sich dä Jerd wedde sieleruhich en de Bank dächt setze un ahnfing, met enem ahle Mätz an de Bank ze schnibbele, kohm de Puff von hengen op en ahn, schlooch dä Jerd esu en de Nacke, dat dä mem Kinn opdächt schlaage, ene Bröll dächt, ene Ketsch em Kinn un de Naas am bloode hatt un wie der Deuvel am Dengen eraus woor.

De andere Morje soosse wedde en de Bank, wie et kuurt vüür de jruuße Paus an de Düür klopp. De Puff jink noh-luure.

Wie e de Düür opmaht, jink e Jebröll loss un e Jekreetsch. Dat woor däm Jaus Bärbche, däm jonge Bärbche, seng Stemm. Dann klatsch de Düür zoh, un em Flue woor en wöste Ballijerei am Jang un emme mieh Jebröll, jertz och met Mannskeerlsstemme dozwesche.

Die Pänz soossen stockstief doh, esu jar de Jerd.

Et duurt wahl en vierdel Stonnd, iehr dat de Rektor kohm un de Klass heem dächt shecke.

De Lehre Puff kohm iersch noh vier-zehn Daach wedde en de Scholl un hatt noch e paar Flastrere em Jeseech un am Hals un en Dotzend ruude Schrööm un Mohle. Däm woor et Bärbche dorech et Jeseech jeääch, met de Nääjele. Kuurt donoh woor et fott, met sengem Jerd. Wohin, weesß ich net. Och die ahle Jaus mem Peete trooken e halev Johr späade uss, un dat ahle Jehöösch wuurd avvjeresse, dat heesch nä, de Naach, bevüür et avvjeresse sollt werde, brannt et av.

Wenne nu meent, ich hätt üch dat vezällt, weil ich Spaß dodrahn jehatt hätt un wöhl, dadde dodrövve laache söhlt, dann sedde om Holzwääch. Ich moß Üch un mich frooge, wie dat kütt, dat Mensche esu deef en de Dreck könne komme, noch mieh, ov me net all Schold drahn senn, weil me seleve satt un wärem hengerem Ovve setze un net sehn welle, dat drussen eene alleen met senge Nuut un hongerich an Liev un Siel em Kahle steht. Schänge un de Naas veträcke ess leechte wie de Düür opmaache, ne?

Et sall mich wondere, wat usse Herrjott davon hält.

W. N.

Klein Hännschen wollt spazieren gehn

Wollte. Ävve net janz alleen.

Wo e hinwollt? – Noh Mengde.

Watte doh wohl? – Dem Heinzje jett zeeje.

Ich moß Üch vezälle, wat ze zeeje woor.

Jlöövt et ode jlöövt et net: de Sieh ess ens en lang Zegg henge Mengde – von Droosdoref uss jesehn – heerjelooft. Un doh konnt me von Droosdoref uss övve Ovvenengde, – jezz de Hött – noh Mengde jonn, ohne övve de Sieh ze mösse.

Wann die Sieh sich e Bett zwesche

Mengde un Droosdoref jeiraave hätt, wees ke Mensch mieh.

Ävve dat et möhsellich woor, övve de Sieh ze komme, wie se dohweschen looch, hann ich öff jesehn, wenn ich mem Richarze Jupp uss Mengdröp op senge Weed op de Sichelöore Segg Heu maache un holle jink. Wenne Jlöck hatt, konnte övveren Fuhr net ze deef em Wasse dorech de Sieh fahre. Vell öfte jink dat net. – Mem Naache? Noch möhseelije. E Bröckelche? Beim nöhkse Huhwasse woor et wedde fott.

Su jink et och zweschen Ovve- un Neddemengde. Bes de Iesebahn en Bröck broht, von de Hött noh Mengde. Die krääch och e Pädche füür drövvze-loofe.

Vell jeholleve woor och domet net.

Eenes jooden Daachs jink et net mieh andesch: en richtije Bröck moht heer, von de Hött noh de Kohweed vüür Mengde. Ahnjefange wuurd 1929. Nohm Fröhjohrschuhwasse 1930 wuurd de Veschalung von Pfeile zo Pfeile met däm huhe Booge tereck övverem Wasse jebaut. Donävven woor e Behelefsbröckelche füür et Holzjescherr hin un heer ze schörrje un ze schleefe.

Die Veschalung moß siehnröhks feerdich senn jeweeers, et wuurd att Kiss ahnjefahre füür de Betong ze maache, doh heesch et et sonndaachs morjens: dat Jeröss un de janze Veschalung vom Meddeldeel von de Bröck ess ömjekipp un ennjekraach!

Dat woor derr en Oprääjung! Övveall em Dörrep stonnten Löck beieneen un wooren am vezälle: häste att jehuert? un: wie ess dat dann passiert? un wat me söss wees un net wees un rööot un komme hätt jesehn un ich hann ett joh att emme jesaht.

Dovon wees ich ävve all nix mieh, uusse, dat eene Mann, dä de Wach hatt haale mösse, met enn et Wasse woor jekipp un duud blevve.

Ühr werd drop komme, wo alles, wat kruffe konnt, de Sonndaachsnomme-taachsspazierjang hin däht maache. Ich wöör et leevs att vüürem Meddachesse jeloofe. Ävve iersch nohm Kaffe jink et loss: Oma, Opa, Vatte, Motte, uss Jriet em Wäjelche, Ohm un Tant un ihr Pänz von nävvenahn. De reinste Prossijohn.

Wat loochen doh ene Hoofe Latte un Brädde un Baleke kreuz un queer em Wasse! Un op beedse Segge von de Sieh alles schwazz voll Mensche. Et woor eenem schodderich am Liev.

De andere Daach hatte me Besuch. Ich wees net ens mieh von wem, kann senn von Möllem, jedenfalls net ussem Dörrep. Un die hatten ene Quass bei sich, genau wie ich fönnef Jahr alt.

Un weil me att de janzen Daach „Bröck



baue un ennkraache losse“ jespellt hatten, moht ich däm Quass jo vezälle, wat loss woor. Jung, wat woor ich stolz! „Bei uns ess en Bröck ömjekipp!“ Wer kann esu jett att von sich saage. Nohm Nommataachskaffe heesch et: „Joht noch jet eraus spelle.“ „Saach“, frooch dä Quass, ode säht ich, „solle me net ens die Bröck luure jonn?“ Me wollten de Motte leeve nix saage un uns jet plooge, füür flöck wedde deheem ze senn. Dat bröhten die jar net ze wesse.

plooge – beeilen

Wie lang lööf me met fönnefjöhrije Beenche von de Veehjass lans de Aache – Dich noh de Mengdene Bröck, och, wemme sich plooch? En jood halev Stonnd? Wie lang moß me luure? „Ooch, süch ens doh!“ un „Nu luur ens heh!“ un „Dohengen!“.

Op de andere Segg kamme och, dat Bröckelche ess janze. Von doh uss sieht alles noch jresselieje uss, un von de Mengdene Segg wedde andesch.

„Weesde wat? Me jonn heh op dä Segg övve die Wisse wedde heem. Komm, me loofen, et widd att düüste!“

Do kütt ene Zong. Dronge heer.

Wat dat Wasse en Korrev maht! Un von de ande Segg kütt och eent.

Wegge jeloofe. Wedde ene Zong. Noch eene, noch eene.

Dat ess joh ärrech fremb heh. – Maht nix, jlich komme me ahn de Iesebahnbröck.

Et widd emme mieh düste. Jott sei Dank, dohengen ess de Bröck.

Die Bröck? Do stonn joh Hüüse bei! Ävven die hatt ävve kenn Hüüse en de Nöh!

Doh fiehrt joh en Jelektrische, ävve en janze andere wie deheem! Un e Auto! Un die Bröck ess janze andesch. Näh, och net die övve de Aache op de Bröckbereg ahn.

Wat, wie, saach, hüür, wo semme heh?

dannes – her

– Loß me leeve wedde ömmloufe. – Em Düüstere?

Hadde att ens zwei fönnefjöhrije Ströppche em Düüstere an ene Bröck op de Strooß stonn jesehn, die net woßden woheer un wohin? –

Un dann komme de Träne. „Huh, huh-huu, ich well noh de Mama!“

Bloß, wie???

Nu könnt eijentlich de Schutzengel opträdde.

Dehte och.

Bloß hätt dä kenne wieße Ponnijeel ahn un kenn helle Locke öm de Kopp un kenne Hellijscheng, kenn bläcke Fööß un kenn Flühele. Un kallt och net fisse-lich un fromm wie em Kreppespell.

Enä, dä fiehrt om Radd lans die zwei, luurt sich öm, hält ahn un luurt noch ens, däut met eene Hand seng Kapp noh hengen, dat me e Stöck Pläät lööchte sieht, steech avv und kütt die paar Schrett wedde öm. Hä sieht uss wie ene janz jewöhnliche Arbeedsmann, hätt ene Schnäuze, su en Fleech, kallt, äss wenne von Plees wöör, wie e frööch: „Wat ess dann met üch zwei loss? Wat krieschd e dann esu? Hadde jet ussjefresse?“

Daasch me met enem fremme Mann spreche? – Wenn ävve kenne andere doh ess? – „Enä, me senn bloß de Bröck luure jejange.“ – „Wat füür en Bröck?“ – „Die ömjefallene. – „O Jott, en Meng-

de die? Do kodde jetz dannes? Em Düüstere? – Un wo wonnd e?“

„Ich en de Veehjass, un dä en Möllem. Ävve dä ess bei uns zo Bisuch.“

Ne Engel weeiß, wo de Veehjass ess, iersch rääch, wenne op de Polleve arbeed, dohin noh de Schich fährt un vüürher en de Jass noch seng Schweste besöhke well.

„Bess de kenne böse Onkel?“ frööch eene von dä zwei Trabante, „söss säht et menge Papa dem Hoffs Hännens.“

Dä Mann laach, hivv dä eene Quass op de Stände, dä andere vüür sich op de Bau, fiehrt övve de Mölldorve Bröck, noh links övve de Zang, de Iesehamme erop un moß sich ovven ens de Kapp avvnämme un de Schweeß von de Pläät wösche. Zwei Pänz om Radd ess janz schön schwer. Ene Pollezei kütt net, un de Uhlerodd erav jeht et ohne ze trädde, wenn och met vell Jeschöddel op dä m rubbelije Pflaste.

Un dann kütt de Aachebröck. Un doh jeht et noh de Säusweed erenn. Un doh dorech dat Päddeche jeht et noh de Tant Jretche.

Die zwei hann wedde Möllopp.

„Huhuh! – Dat ess de Italljäne Pette, dä jeht nomm Höök, „Musse eine Korren trinke. Brauch eine Zigarett!“ –

Wat die deheem fürre Spell maache? Vestohde datt? Et woor doch jar nix.

Me hann doch bloß die enjefallene Bröck jeluurt!

Polleve – Dynamit Nobel

Hoffs Hännens – Dorfpolizist

Ponnijeel – Kittel

Iesehammer – später Walterscheid kalle – sprechen

Pläät – Glatze

Plees – Niederpleis

Sprengwaage

Mieh wie drei Stonnd hatten die Quäss von de Kerechstrooß, vom Weinjartenwääch un vom Hoffjaade jebbruch, bes se die vom Pool un von de Duuvejass wedde uss ihrem Untestand am Stand Elef erauskammesöhlt hatten. Bühle un Schmeß hatten se all jenooch. Un janz jeblevve von dä m Untestand woor bahl esu jood wie nix.

Basch Mooß zöckelten se heem, veschweeß, vedrecks, Honge bes onge de Ärem un Duesch, „Jong“, säht de Möllesch Petteche, „Jong, wenn ich heemkomme, suffen ich ene haleve Emme Wasse!“ Hä doref de Kürtens ihr Ella fodere, dränke un strijejele. Un dat Ella soff ene haleve Emme en eene Tour läddich.

„Ich haalen et net bes deheem uss“, säht de Düres, „loß me flöck lans de Annonisbachquell jonn. Wenn de Duur et Wasse von de Heembachquell süff, werde mir net von de Annonisbach sterve.“

En zwei Menutte wooren se doh. Et

woor net janz einfach, doreche dä Mudd ze komme, ohne et Wasse möllechich ze maache. Se kräächden och jede bloß zwei Häng voll, dann woor et net mieh ze drinke.

Wenn se och söss emme wie die Jaachhöng renne mohten, hück wooren se ze mööd un et woor inne vell ze wärem, un woor doch iersch Ahnfang Mai. De Ohm Kohned hatt att vüür en aach Daach proffezeiht: „Pass op, Chress, me kriejen e drüch Johr. Jäv dich beizetze an et Heu, söss wierß nüß mieh noh!“ Die Pänz brohten alsu bahl mieh wie zwanzich Menutte bes an de Jeerschdebetz, dorech de Lindlohrsch Jaade un de Berechstrooß erenn.

„Heh, luurt, dem Hosch seng Pooez steht op, doh drinke me uss satt!“ schreit de Heinemännche.

„Un ich donn mich jet wäsche, söss knoorz de Jrooß wedde de janze Ovend, un ich daasch am Äng de Sonn-daach net noh Mengde noh de Jööed.“ meent de Fränz.

Basch Mooß – erschöpft

Jeerschdebetz – R.-Wagner-Platz


Duur – Flurschutz Lohmar

am Äng – schließlich

Jööed – Patin

Nu leefen se doch noch ess Trab für de letzte hondet Mete. De Heinemännche woor de ierschde am Pompeschwängel, un wenne och jenuu esu vell Duesch hatt wie die andere, hä leht et Wasse loofe, bes se all satt wooren. Dat dat ene Hoofe Spektakel, Jelaachs un Jekreetsch joov, wenn dat Wasse erömspretz, en de Hembde, en de Schohn, en de Maue, vesteht sich.

Jraad, wie de Heinemännche de Kopp onge de Schnuut heelt un uss beedse Häng ene deefe Zoch wohl donn,



schreite: „Au!“, verschluck sich, verschlabbet et mierschde Wasse, wohl saage: „Ihr sedd jemein!“, weile meent, eene von dä Quäss hätt em ene jehüürige Knupp en et Kreuz jejovve, ävve wie e sich erömdräh, kütt jraad et zweitemohl en Fuuß op en ahn un triff en fies an de Hals. Hä kipp öm, fällt sich am Pompesteen ene deefe Ketsch en et Knee un kritt och noch ene Trett en de Hengesch. Dann iersch wierde däm Hosch seng dreckelieje Fratz met dä Dreidaachstoppele onge dä dreckelieje Kapp, de Schnäuze voll Prömtabaks-knaares jewahr. Jetz maht dä Hosch de Muhl op, en der mieh brongschwazze Stommele wie janze Zäng stonn, un kretsch: „Ühr Saupänz! Ich sall üch hähälpe, me heh de-de, et jan-janze Wawasse ze ve-vem-vematsche. Ich schlachlagen üch all Kno-knoche kapott!“ Dä Hosch stottet bloß, wenne besoffe ess. Un dat esse mennestens dreimohl de Woch, mierschdens att et Nommetaachs. Un dann esse su zeweersch wie enen Doorn, un et ess nix met em ahnzefange. Dat wessen och die Quäss. Die schnappen sich flöck dä Heinemännche un hauen met em av.

Noch iehr dat se heemjonn, heesch et: „Dat kritt dä Hosch wedde. Dat hätte kennem Doove jedonn!“

Un dann schenk de Sonn, enen Daach

wie de andere, un ke Wölekche ess en de Luff, de janze Mai, de janze Juni.

Et Heu ess en e paar Daach erenn, bloß, et ess erbärmlich wennich. De Erpel schleefe net, me kann Ängs Juni noch bahl övveall de bläcke Erd sehn. En Jaade senn de Erze hadd, iehr dat jet drenn ess, un de Ohm Kohned lööf eröm un säht: „Johd seddich mem Wasse öm. Ühr sedd noch öm jede Droppe fruh!“

Op Johannesdaach jitt et e schweer Jewidde, bei däm ze Mengde zwei Schüüre avbrenne un ze Luhme e Huus. Bloß Rähn jitt et net esu vell, dat de Steen naß werde. Un söss Joesch schödd et doch bei Jewiddere wie uss Emmere.

„Dat senn bestimmp die Sau-Zeppeline schold!“, heesch et em Dörep, wo se de März et ierschdemohl ene Zeppelin jesehn hann, „dat dat Wädde esu veröck spellt!“

Op Anna hätt em Dörep noch eene Pötz Wasse: dä op de Borech. Ävve mieh wie e Erpelsemmeche voll kritt kenne, de Schäppemme schleht och att op de Jronnd.

Un dann lööf am Aachedich de Aache net mieh övve de Muur, am Uhlerodd stonn bloß noch e paar Pöölche, loofe deht et Wasse net mieh.

Die Veeh hann, schörrjen met Fääßje un Bödde nohm Maieschlämmche, schleefen met Emmere die Böddche un Fääße voll, dat deheem dat Jebröll von däm dürschtije Veeh ophüürt.

De Hosch hätt e dreihondet-Lite-Adeldsfaaß op de Kaar lieje. Hä ess och att e paarmohl jefahre un hätt domet Wasse von de Aache jehollt. Et letz hatte ävve et Faaß bloß hallevvoll jamaht. Hä konnt net mieh, weile wedde su vell Kohn em Liev hatt. Un wat hatt seng Liss jeschannt!

Nu wohle trotz Kohn et Faaß ävve janz voll maache.

Ühr hatt jood laache! Schleeft ens en dä Hetz en sebbenzich, achzich voll Emmere vom Aachebett erop op et Ove, bes ahn de Kaar un schött et doh ovven en et Faaß!

Dat kridde en zwei Stond net feerdich. De Hosch och net, wiewahl datte noch e paarmohl en Muhl voll Kohn noh däht schödde. Et widd däm Fränz, dem Petteche, dem Düüres, dem Heinche un noch e paar andere von däm Trüppche ärech lang, bes de Hosch endlich se Faaß voll hätt.

Jajoh, liejen die henge de Strüch un können sich bahl net haale vüür Laache. Söss bröht ich dat joh net ze vezälle.

Die hann däm Hosch net vejesse, wat serem vesproche hann, un waaden att en etliche Daach drop, dat et esu wegg ess. Se mössen joh füür dat, wat se vüür-

seddich – sittsam, sparsam

söss Joesch – in anderen Jahren

Prömtabak – Kautabak
Knaares – klebriger Schmutz

zeweersch – quer, schlecht gelaunt

hann, wesse, ov un wann dä Hosch Wasse holle fährt un wievell datte jelaade hätt. Wenne nämlich nöchte ess, jeht dat net, wat se vüürhann.

Hück paß alles. Se können sich esu jar op de bläcke Been klatsche, wenn de Mücke jar ze weld steche, se können bahl unscheniert kichere, de Hosch merrek nix, su baschmoß un voll esse.

Jozeggs klempe op die Kaar un setz sich vüüren op et Querbrett, weckelt de Leng loss, rööf: „Hüh, Max!“, un langsam zögelt dä dat hubbelije Pädche op de Letten un et Looch ahn.

Kohm esse am fahre, fupp de Düres henge däm Struch her, lööf jeböck – ävve de Hosch hüürt und süht suwiesu nüüß – an et Äng von dä Kaar, wo joh die Ussloffschnuut von däm Faaß e besje hengen erussregg, deht an dä Jreff met däm huhjeklappte Häbel, dä die Schnuut esu fass zohdröck, dat kohm ene Droppe eruskütt, ene krommjeboogene Näjel met ene lange Koord enhänge, löht die Kohrd bes ahn et Äng, en fuffzehn Mete, dorech de Fengere flutsche un löht dat Äng dann och op et Pädche falle.

Dann waaden se, bes de Hosch met sengem Fuhrwerek öm de Eck en dat Pädche op de Ahl Strooß zoh ennbeech, un flitzen dann em Jalopp räächs hengerem Looch op de Schoosieh un setzen hengerem Mürche am Werth, wo et en de Jrund erenjeht, bes de Hosch doh lanskütt.

Jetz ess et ke Kunsstöck, die Kohrd ze krieje, fass drahn ze träcke, bes dä Jreff von däm Faaß noh ongen jewääch widd, wenn och net janz esu deaf, äs wenn de Hosch et op de Weed beim Addele von Hand seleve däht. Dobei flutsch dä kromme Näjel eraus, de Petteche wekelt die Kohrd op, se luuren noch ess all, wie schön dat Wasse uss däm Faaß dä Feldwääch em Jrond deht spreng. Doh widd et ene Daach net stööve. Dann loofen se sih övve de Schossieh en de Kerechstrooß erenn, bes an de Krausstrooß, wo se jrad de Hosch en de Hoff erennzöggele sehn. Et Wasse lööf noh emme uss däm Faaß, wenn och att vell langsame.

Doh hüüren die Pänz och att et Liss schenge: „Joh Mann, du besoffe Ferke, häss de net ess die Schnuut vom Faaß zohjemaht! Doh lööf de joh et janze Wasse druus!“

Iehr dat de Hosch jet bejrief, klopp et Liss met de Fuuß an et Faaß, dat sich janz holl ahnhüürt, – ke Wonde –, un fänk ahn ze schänge, hüürt, Uhr möht de drei schlemmste ussem Dörep zusammenämme, dann wöör et noch net esu schlemm wie jetzt et Liss alleen, un dann kütt et am Hoff erussjeschosse en

de Jrund erenn un seng drei Könkelche met Jeschrei hingedrenn, un de Hosch steht doh wie mem Bömmel jefletsch un röpp un wääch sich net.

E Jlöck: de Hoffs Matthes von de Duuvejass bejähnt däm Liss fönnef Mennute späade, schnapp et sich beim Ärem un schleev et met heem, un et duurt wahl bahl en halef Stond, bes de Matthes un et Draud, seng Frau, et irschde Woord ussem Liss eruskrieje: „Ich jonn en de Aache ode en de Leye Weihe!“

Ävve noh jet Trüüste un jood Zorädde fänk et ahn ze kriesche, dat de meens, de Ooge leefen ussem Kopp. Un wie et düüste ess, brängen seret esu jar heem.

De Hosch setz en de Stovv un weefß emme noch net, wore drahn ess. De Matthes un et Draut donn et Peerd en de Stall, jävven die zwei, drei Emmere Wasse, die noch en däm Faaß senn, de Dier un maachen sich op Heem ahn.

De anderen Daach jeht de Matthes nohm Pastuur, un dä donoh nohm Liss, un dann nohm Hosch en de Stall. Un wat dä, de Hosch, net de Stall, doch, dä och, ze hüüre kritt, hätt sich jewäsche. Ävve et Liss hätt och de Levitte jelasse krääch!

Dobei merrek de Pastuur och, dat dat met däm Faaß net bloß Dusselichkeit vom Hosch woor.

Hä kennt seng Trabante em Dörep, un noh zwei Daach weefße Bescheed, maht en Deel Besöhksjäng usse de Reih, un donoh jitt et en jedem Huus Knöppelzupp.

Bes em haleve Septembe, wie et endlich wedde düchtich rähnt un de Dier mem Wasse us de Daachtrötsche jedränk könne werde, wonderen sich em Dörep ene Hoofe Löck, wat für brave Jonge doh wonne un Wasse us de Aache schäppe un schleefe helepe.

Der, von däm ich et weefß, hätt me verode, datte mieh wie zwanzich Johr hätt jebruch, bes em ojink, datte die Buuß, Wasse ze draage, ze Rääch ophatt krääch.

Un de Hosch hann ich op senge ahlen Daach noch nävven sengem Liss vüür de Düür op de Bank setze jesehn. Un emme nööchte.

W. N.

Schwanebeß

Hüürt sich vüürnehm ahn, ne?

Wie Schwanensee, Schwanengesang, Schwanehals.

Un Schwän om Barongs Weihe, dat kann ich me och net rääch vüürstelle. Dat kütt me su fremb vüür wie ne Kallekuttehahn em Höhnehoff, wie en

Quätschetaat ongerem Chressbohm, wie nen schwazzen Ahnzhoch beim Schlaachfess.

Ävve av un zoh dächt sich ess ene Schwan op de Trerichs Weihe ode de Aache veloofe ode besse vefleeje. Düss Johr esu jar ze zwätt, met sechs kleene. Die paddelten vüür de Iesebahnbröck op de Aache eröm, wo et Wasse schön stell ess un em Mudd vell Foode ze schnäbbele.

Bloß, jetz ess bahl Somme, un de Sonn meent et att jood. Esu jood, dat mir Pänz selbsredend nohm Schlämmche schwemme ode Kiss krabbele jonn.

Un sühsde Streech! Die Schwän stüürt dat net.

Bloß, wenn de dich ze noh drahn traus, mäht dä Vatte ene lange Hals op dich ahn un blöös. Alsu blieve me wegg jenooch fott. Et ess Plaaz jenooch zwischen Ulerott un Achedich.

Un me sprengen erenn un eruss, beschmießen uss met Mudd, bess me ussehn wie die well Säu. Zweimohl jetauch, ess alles wedde fott.

Un de Libelle stonn am Schilef en de Luff, un, jusch, senn se wedde fott, un de Schwaleve schlaagen sich övve dem Wasse de Kröpp voll Mücke un Fleeje, un et blieven ere emme noch jenoch övverich füür ze steche. Blos, de Oma hätt uss jeliert: nämm e fresch Blatt vom breede Wäjerich un riev dä Saff enn op dä Queijel. Dat stemmp, en zwei Menutte hilef dat.

Et ess esu richtich schön heh am Schlämmche.

Bes, joh bes de Kolvens Pikkelo kütt.

Dat ess schlemme, äss wenn de Lehre Eich ode de Stemmesch Hein dich ohne Aufjaab kritt.

Wie dä Pikkelo an dä Name kütt, weeff ich net. Dä ess en allem alles andere wie kleen. Dä hätt seche de deckste Kopp em Dörep, de längste Ärm un Been, de jrüzde Muhl. Un e Äkel esse, jrüüte hann se och ze Sieborech keent. Un dat well att jet heesche.

Ke Spell, wat dä net vederrev, kee Jescherr, wat dä net kapott maht, kenn Biesterei, die dä usslöht.

Dobei hätt dä eijentlich bei uns jar nix veloore, dä ess att lang uss de Scholl.

Wie de Karlche ens füür enn jesaht hatt: „Hau doch av, jank doch bei deng Zoort Quäss!“, doh hatt enn de Pikkelo esu en de Schwefkaste jenomme, datte blau Leppe hatt krääch.

Un e Metz hatte och en de Täsche. Me trauten em zoh, datte och domet steche dächt. Me jinken emm wegg jenooch uss dem Wääch.

Et bess jinke me jetz och tereck heem. Velleech jeht et ävve jetz och, me senn doch ze mieh wie zwei Dotzend!

De Pikkelo deht sich och mieh wie zwanzich Schrett von usse Kleede uss, un kenne von uss stüürt sich an enn, wennichstens domme all esu.

Kohm hätt de Pikkelo de Zieh en et Wasse jedonn, sühte uss Sprongbrett, selevs jemaht, vell schöne wie die hückzedaach em Hallebad. De Pikkelo sprengt drop wie doll, waggelt an dä Pöhlche, un en zwei Menutte ess et kapott.



Kenne von uss säht jett.

Nu sprengke en et Wasse, fänk met Lehm un Steen ahn ze schmieße. E paar von uss nicke hörsch: „Kott, me hauen avv!“

Doh kommen öm de Eck lans et Schilef die Schwän, vüürahn de Vatte, dann die sechs Jonge, dohenge de Motte.

Dä Pikkelo widd doch die Dier en Rauh losse?

Jedenfalls blieve me op eemohl doch all stonn un luuren de Pikkelo kott ahn. De Häs rööf esu jar: „Loss blos die Dier jeweerde!“ – „Un wenn ich dat net donn?“ rööf de Pikkelo zeröck, „Komm doch her, wenn de jet wells!“ Un wiref ene Klompe Lehm op die Schwän ahn, Jott sei Dank ohne ze trefe. Dann löhte sich op die Schwän ahn en et Wasse falle, schnapp sich ene Knävvel, dä am Rand litt un tapp op de vöddeschde jonge Schwan ahn.

De ierschde fönnef, sechs von uss jonn wedde op et Wasse ahn, velleech vüür ze helefe, wenn et nühdich söhl senn.

De Schwanevatte blöös un dräht sich eröm. De Pikkelo deht, äs wenne sich net drahn stüüre dächt. Hä spritz met eene Hand enn Jusch Wasse op die Jonge ahn, schwenk senge Knävvel, un die jong Schwän fiepen un paddelen dorjennen. Doh mäht dä Vatte ene lange Hals, schnöcks de Kopp vüür, de Pikkelo deht ene Bröll, löht de Knävvel

Queijel – Schwellung

kott – böse

Kannepeh – Sofa

Jeecheltekoornde – schwarze Johannisbeere
jazz – bitter

falle un pack sich an de Rögge, wore att ahnfänk andesch ze heesche. Doh kritt dä Schwan enn am kleene Fenge ze pake. De Pikkelo schreit noch haade: „Au!“ un hivv beedse Häng huh. Lehr, datte dozoh kütt, uss dem Wasse ze tappe, pack de Schwan enn wedde beim Henges, dissmohl ävve esu fess, dat de Pikkelo ene richtije haade Krieh deht un spreng wie ene Hierzebock, hin un her em Wasse. Jedesmohl, wenne sich loss jefupp hätt, pack dä Schwan noh.

Mir Pänz stonn am Oove dobei un röppen un wääjen uns net, ov vüür Staune ode Freud ode Angs, ich wees et net.

Dann kütt de Pikkelo an ene deefe Stell ze falle, jerööt janz ongeret Wasse, un dä Schwan dräht sich eröm un schwemmp, esu siehr, wiere kann, henge sengem Wieve un dä Jonge her.

De Pikkelo kütt von selevs wedde huh un och noch an Land. Ävve doh kippe öm wie ene naaße Sack.

Du leeve Jott, wie sieht der uss?

Hengeneröm kanns de dat, watte ahnhätt, net mieh Badebotz nänne, dat senn blos noch Fetze.

Ävve och senge Henges hänk an en Dotzend Stelle en Fetze, un et Bloot lööf em erav. Alles, wat me an Täschendööche, un kenn ze reene, hann, un dem Pikkelo seng Hemp, en Stöcke jersse, jeht drop füür alles zohzepappe. Wie de Pikkelo noh en fönnf Menutte wedde zoh sich kütt, hälte sich am kühme un am jöömere. Me daref en net ahnpacke, un opstonn welle och net. Kanne wall och net.

Zwei von uss leefen johzeggs nohm Röttchens Muhr. Dä hatt ene Auto. Zwei andere rannten nohm ahle Dokte Schoenen.

Wie dä sich de Pikkelo besooch, schöd-delte mem Kopp, trook de Stiern kruus un säht füür de Muhr: „Moment, Herr Röttgen, ich gebe ihm eine Spritze, dann fahren sie ihn ins Krankenhaus! Da ist einiges zu nähen!“ Un richtichewäch: an sebbe Stelle mohte jenäht werde, un en zeh, zwölf Stelle wuurten jeflastert, un de Pikkelo moht em Spidohl blieve, bess de Schoenen de Fäd-dem träcke konnt.

Hätt Ühr net och zebasch Freud jehatt, dat dä Äkel Pikkelo ess enn jehüürige Abreibung krääch hatt, noch dozoh an esu ene schön Stell, von enem Schwan. Un wenne dat och denkt, dann könnde ens sehn, wat mir füür brave Pänz wooren, mir senn enn de andere Daach em Spidohl besöhke jejange un hann em en janze Stang Kollertsch metjenomme.

Un de Pikkelo woor kenne Äkel mieh, wennichstens zo uns net.

Met esu enem zeketschte Henges jeht dat wahl och net.

Fuhrluhn

„Jriet“, kütt de ahl Hoffs, vom Hännes un vom Draut un vom Leuet un von noch fönnf Pänz de Moode, dreivierdel doof, de Rögge kromm, net männeche Zannt mieh en de Muhl, e schwazz Koppdooch öm, bei de Oma, ihre Cusien, erennjeschluff, „Jriet“, un se kreettsch esu hadd, dat de Katz vür Schreck ongeret Kannepeh stifte jeht, „meng Jeecheltekoornde senn esu jazz wie en Sau!“

Öm Jeecheltekoornde, ode besse öm dat, wat me dovon maache kann, jeht et.

De Oma ihre Schäng, ode soll ich besse saage: de Papa, deht nämlich em Jaade männeche „neumodische Dress“ maache. Hä planz ande Zoorte Eerpel, trick Spalierobs met Name, von danne de Leuet säht: „Bei däm Name mossen die schmecke wie Jeff“, un hä ess net für Jeld un jood Woort ze bewääje, eene dovon ze probiere.

Un füür jet Johre hätt sich de Schäng uss ene Boomscholl en neu Zoort Jeecheltekohrnde jekoof un sich zeeje losse, wie me se usslichte deht un wie me se zeggich met riefem Mess vesorje deht un zwei-, dreimohl et Johr de Erd öm die Strüch met kleenjeschnege Jras un Strüh avvede deht.



Nu trick de Schäng von drei Strüch dobbelt esu vell Jeecheltekohrnde wie de Hoffs von fuffzehn, zwanzich. Jenau kamme se jar net zälle. De Somme stonn doh nämlich mieh Brennessele wie Strüch, un en Scher, en Hack ode en Schöpp ess me Lääbe noch net drahn komme, un Mess? – „De Hohnde setzen doch de haleve Zegg dronge“, säht de Hännes.

Die paar Häng voll Jeknürschels, die et Draut plöck für onge de Johannesbeer-

Kollertsch – Lakritze

Jeknürschels – verhutzelte Früchte

scheele ze donn, senn och kohm de Möhde wert.

Nu hätt ävve dä Schäng et letzte Johr esu vell der Jeeheltekoehrnde jehatt, datte ere su vell övverich hatt, datte fönnef Fläsche dovon voll hatt maache könne für Opjesetzte. Die hatte, met Kohn drövvve, sechs Woche en de Sonn stonn jelosse, dann met Kandis, Zimtstang, jet Vanill zeräächjemaht. Dat woor en zemliche Arbeet. Ävve wie der Opjesetzte ferdich woor un ene Daach köhl jestande hatt, doh konns de de ävve och de Fengere donoh lecke.

Selbstredend hatt och de Oma en Fläsch dovon krääch. „Huh“, säht se, wie se enn probiert hatt, „huh, wenn ich dovann noch jeden Daach fönnefunzwanzich Johr lang ee Pennche drenke, werden ich mieh wie hondet Johr alt!“

Nu hatten de Hoffs och Opjesetzte maache welle, hatten ihr Jeschrähbels all jeplöck, de Italjäne Pette hatt esu jar all de Brennessele drussjehaue, hatten alles en Fläsche jedonn, Kohn drop, un noh vierzehn Daach att hatt de ahl Hoffs jemeent, se möht probiere. Un dat woor „esu jazz wie en Sau!“

De Schäng ävve woor bei sengem Schäff enjelaade jewers un däht dän nu och enlade. Et joov Kaffe, die Fraulöck heelen ene Vezäll övve Jehäkels un Jestrecks, die Mannskerls jinken en de Jaade, un wie se weddekomen, wuurd dä Opjesetzte probiert.

Öm iehrlich ze senn: e paar Kohn hatten se att em Liev. Un dä Schäff konnt sich net jenooch donn em Lovve von däm Opjesetzte. Wie nohm Ovendessee de Schäng frooch: „Drinke me noch ene Opjesetzte?“, doh säht dä Schäff tereck joh un meent: „Frau, du mußt den auch mal versuchen.“ Weile ke Platt konnt. Ess Donnerkeil! Se mahten net bloß die een Fläsch läddich, och en zweite krääch övve de Hälefte de Schwindsch.

Se wooren janz schön opjekratz, de Schäff un seng Judela!

De Schäng kratz sich henge de Uhre un flüstet sengem Bärbche zoh: „Et sall mich wondere, wie die zwei heemkomme!“

Hä hatt att ens jeluurt, ov de Röttchens Muhr met sengem Horch-Taxi wedde doh wöör. Nä, de Karraasch woor läddich.

Wie de Schäng vüursichtich jet von enem Taxi rädde däht, säht de Schäff: „Kommt gar nicht in Frage! Eher lasse ich mich von ihrem Sohn im Bollerwagen nach Hause fahren! Aber ich denke, wir gehen auch wieder zu Fuß nach Hause.“ – Ene Auto hatt domols och ene Handelsbevollmächtichte net.

Na, jäjen haleve zehnn wollen sich die

zwei op heem ahn maache un kommen bes op de andere Segg von de Strooß nävven dem Schmitze Schäng senge Brüüdcheslaade. Doh knicken imm de Been fott, un och sie moß sich an de Muur stippe un kritt sich net enn vüür Laache. De Schäng hätt et komme sehn, jeht erövvve un well noch ess vom Taxi ahnfange. „Neiheien!“ schmettet do dä Schäff, Karel dähte heesche, un hä sink jern, esu jar, wenne net jeschlupp hätt, „Neiheien! Ich fahre im . . . im Boll-Boll-Bollerwagen, im Boll-ler-wagen.“ Un laach och wie net jescheid.

E par Fenste en de Nohpeschaff jonn och att op. Dat ess dem Schäng unjemütlich. Hä lööf zeröck, trick dat Heuwääjelche uss dem Schopp, kehrt mem Handfääje flöck de Dreck dovon, rööf: „Bärbche, breng ens flöck drei Kesse!“ und säht für senge nöngjöhrije Quass: „Komm, fahr se, et widd denge Schade net senn.“

Noh e paar Menutte setzen die zwei richtichewäch, jet eng, eene de Been vüür – ene de Been hengeneraus, op däm Waage.

Dorech de Werth, de Hindenborechstrooß, wie fröhte de Siebenjebirchsallee däht heesche, un de Bachstrooß donn sich e paar Fensteren un Dörre op un de Löck laachen henge däm Fuhrwerk her, weil die zwei senge, wat dat Zeuch hält un zweschendorech och se leve laachen, knochehadd laache.

Dann kommen joh kenn Hüüse mieh, uufse henge de Unteführung et Zolesch Hüüsje, bes an de Viktor Bauer. Un dann es et joh net mieh allzo wegg. Uss dem Waage mössen se noch jeholefe krieje un e besje de Trepp erop. Ovven kritt de Schäff et Portemenneh, nimmp zehnn Marek, nöngsehnhondet-zweiundressich, un säht: „Das ist eine Anzahlung. I.ch weiß noch was Schönes für dich!“

Ich botze me de Schweiß av, un wie ich jonn well, däut me an de Düür de Madam noch zwei Tafele Schoklaad en de Häng un säht: „So schön bin ich noch nie gefahren. – Komm gut heim.“

Ich moß schwer prackessiere: donn ich een Tafel ongewäächs esse un die andere mem Jriet deele ode kritt dat och en janze? Wie ich ferdich ben met Övveläaje, es et ze spät, mem Esse ahnzefange. Ich trüüste mich met dä zehnn Marek.

Op menge Jebuurtsdaach, e paar Woche späade, bränk me de Papa e Pakät met vom Schäff: ene decke Boch, „Die Sagen des klassischen Altertums“.

Dat hann ich hück noch.

Jaja, dat Lenche, wat sengem Könich dorechjebrennt ess un met noh Troja jetrocke noh däm Pleiboi Paris! Wenn ich dä ahle Priamos jewers wöör, ich

prackessiere – überlegen

hätt se beeds övve de Muur jeschmesse!
Wie kamme blos wäjen enem Frau-
mensch esu de Weltjeschichte op de
Kopp stelle!

Schaad, esu ene jooode Fuhrluhn hann
ich me Lääbe nemmieh ahnjebodde
krääch.

Äschekreech

Wat soll me eijentlich de Löck jlööve?
Ich meenen, wat et Wädde ahnjeht. Wie
de Sommere un de Wintere, de Fröh-
johre un de Herevste senn.

Jitt et ens vierzehn Daach kenne Rähn,
widd jekühmp, dat wöören de Fluch-
zeuje schold. Rähnt et jet öff un vell,
rießen de Löck de Muhl op wäjen de
Atombombe. Hamme ene kahle Winte
un vell Schnieh un Ies, well uss de Russ
jet. Friert de Barongs Weihe de ganze
Winte jar net richtich zoh, dooch et och
net, weil dann et Unjeziefe net kapott-
jeht, un övvehaup, dat schläächde Wäd-
de hann de Minsche vedeent, met all
ihre Vekiertichkeete, un fröte woor su
wiesu alles besse: doh joov et mieh
Schnieh un wennije Kält, mieh Sonn un
wennije Rähn, un „weeßde noch, wat
me ene schüüne Winte un ene lange
Somme hann jehatt, wie uss Jriet op de
Welt woor komme?“

Luursch de ävve en de Statisticke noh,
hätt sich de letzte hondet Johr net vell
jeändet, un wenn de näckste Ieszegg
ode Tropezegg kütt, donn uss de Zäng
net mieh wieh.

Dat söhle me jetruus ussem Herrjott
öveloofe.

Wie et bei uss Mensche jeht: wat en
Reih Johre heer ess, dovon hätt me et
mierschde Schläächde vejässe, un et
Schöne widd, je feerne je schööne.

Wat hatte me en de zwanzije Johre, un
en de dressije Wintere! – Wiewahl ich
jlööve, dat doh och net öff mieh wie
drei Daach lang an eenem Stöck Schnieh
hätt jelääje, zom Schlidde fahre.

Wat hatte me Freud! Hengerem Berek-
hüsesch Jaade en de Duuvejass en die
Kuhl erav, drei Mete die steil Böschung.
Dreimohl jerötsch, woor kenne Schnieh
mieh drop. Ävve om Lehm jink et och e
beßje. De Schneis vom Ravensberech
erav op de Schossieh ahn: eemohl konnt
me doh richtich schliddere, dat ich et
weeß, un dobei ess de Mattheis Hänse
schwer veonjlöck un hätt se Läbdaach e
stief Been behaale. Söns blevs de em
Sand un Jestrüpps hange, genau wie de
Telejraaf erav. – Un heh e Hübbelche
un doh e Hööfje.

Un de Krausstrooß.

Die woor halevwäächs jlatt. Un von de

hühkste Stell hondet, achzich, fuffzich
Mete lang.

Bei jet mieh Schnieh un wenn dat ovve-
re Stöck schön jlatt woor, konnt me och
öm die Eck en de Jrund eravfahre, noch
ens en achzich Mete, lans de Schötthot
un de Lehre Puff, bes de Strooß ophu-
urt un dat schmal, knubbelije Feldwä-
jelche ahnfing, wo me dann en et Feld
kipp, wemme su wegg woor jekomme.
Dofüür moht et ävve att ganz fein jlatt
senn, jrovve Steen fottjelässe un Schnieh
dropjeschmesse, su vell, wie me ze alle
Mann dohin konnten schleefe.

Männechmohl woor et dann esu spee-
jeljlatt, dat me och bahnschlaage konnt,
un me om Schlidde alleen bahl jar net,
un met zwei ode drei ahnjebongene
bloß met Möh de Korrev en de Jrund
erav krääch.

Iehr dat et ävve esu wegg woor, joov et
Kreech.

Wenn Pänz met Schlittschohn koome,
met dänne wuurte me flöck ferdich.
Von dänne lehte me uss net de Bahn
vesaue.

Ävve dä Schötthots Pete, dä Stellmache,
dat woor net esu einfach, met däm fer-
dich ze weerde.

Ierschdens konnt der schänge wie es
Donnerkeil. Zweitens woor der ene
Herr Jemeinderat, drettens konnt seng
Frau noch mieh schänge, un viertens
dähte Äsch op de Schliddebahn schöd-
de, wenn mühelich och noch heeße
Äsch. Un dann woor et met däm dönne
beßje Schnieh op de Strooß am Äng.

Me jinken uns beim Lindlohrsch Hosch
troztdäm de Bessem liehne, ohne ze
frooge, ävve nötze däht dat net vell, de
Bahn blevv stomp un et Ies krääche me
net mieh dohin, wo et jeschmolze
woor. Un flooche konnte me esu vell
wie me wohlen, däm Schötthots Pete
däht dat nix schade. Un seng Pörzje
konnt me net usshänge, doh hatte su en
fiese Klemmfädde dropjemaht.

Däht me ävve op de Poorz kloppe, dann
hatte bestimmp eene von uss henge de
Jadinge jekannt, un de andere Daach
moht eene von de Döreps Polleziste
deheem Spektakel maache.

Ävve wenn de Himmel et well, hann
och die Kleene, Schwaache ens Möllop.
Et joov nämlich ussnahmwies ens
nohm Schnieh kee Tauwädde. Em Jä-
jendeel, et wuurd et oovends jehüürich
kalt. De naaße Wollheische wuurten
stief.

„Jetz schödde me vürrem Schötthot
Wasse op de Strooß!“ heesch et. Wie
ävve eene met de ierschde Jeeßkann voll
kohm, leev dat Wasse terek en de Joss
un däht noch mieh Schnieh fottläcke.

„Dat Wasse ess vell ze wärrem, wat uss
de Leitung kütt, dat könne me net bru-

che!“ schreit de Pål, „Me müssen men- nestens fönnef Kanne voll orjanisire, die en Stond ode zwei drussen stonn losse, bes et ierschde Ies drop ess un dann jeeße. – Ävve de Brause müssen esu lang dovon, söss senn die ze flöck vestopp!“

„Wer kann dann, noh aach Uhr, noch helefe komme jeeße?“ wollt de Fränzje wesse.

Wolle dähten se all. Op jeden Fall stonnten beim Ohm Will op de Berech- strooß bahl aach Kanne voll Wasse henge de Werekstatt em Jaade füür avze- köhle. Un aach Mann dähten, esu jar öm haleve Nöng, fein langsam Dröpp- che füür Dröppche jeeße, un kenne do- ref op dat fresche, weeche Ies jonn, wat sich övve die Äschlöche laht.

Zur Vüürsich wuurten die Kanne noch ens all voll jemaht füür de andere Mor- je, wenn de Pete velleech wedde met Äsch köhm.

Alles moht leis jonn, vell leise wie en de Scholl, un weil de Mond esu hell vom blänkije Himmel däht schenge un bloß heh un doh ens e Wölekche em övveret Jeseech däht fahre, moht och noch opje- pass werde, ov kenne henge de Jadinge luurt.


Wat nu ke Minsch vüürheer hatt jesehn un et noch kenne Wäddeberich em Fernsehen joov, dä emme et Jäjendeel von däm däht proffezeihe, wat et Wäd- de braht, ode Moondaachs et Wädde füür de nächste Sonndaach ode vom letzte Friedaach däht melde, alsu wat sich de Naach av däht spelle, woor uss Pänz Wasse op de Möll, nä Schnieh op de Bahn: et schneit ene janze Hoofe drop, un et woor morjens doch bette kalt. Un et schönste: noch drei Daach Weihnachtsferie!

Bahl woor de Kraustrooß knobbelevoll Pänz un Schliddere. Dat besje Äsch, wat de Pete braht, maht ävve ussem Ies un däm velle Schnieh jar nix. Me brohten net ens ze kehre. Esu jar de Mädche kohmen mem Schlidde bes en et Feld.

De Pete däht et met Kärre probiere. Wenne de Schnieh fotthatt, stonnte om blänkije Ies, un de nächste Schlidde schmeß alles wedde voll. Me hätten je- wönsch, de Pete hätt sich ens op de Hengesch jesatz, ävve dä Jefalle dähte uns net.

Wie e en sengem Hoff e Pädde hatt jekehrt un met senge Frau nohm Dörep jink, säht de Karl: „Somme de Pete ens jehüürich ärjere?“ „Wie dann?“ heesch et. „Me kratzen em dat Pädde wedde voll Schnieh, un dann schödde me von ussem kahle Wasse drop, dat ess jlich met däm Schnieh jefroore, dann kanne et net mieh fottkärre!“

„Aujah! Dat maache me!“ – Dat woor noch schöne wie schliddere.



Un wat däht de Pete schänge, wie e heemkohm!

Et Nommetaachs leefte me zur Av- wächslung ävve ens dorech de Bösch nohm Telegraf un nohm Stand Elef.

Wie me oovens noch ens de Kraus- strooß erav wollten schliddere, wooren vüürrem Pete sengem Huus janze Flat- sche Ies krömmelich bes op de Boddem. Vedamp! Dä hatt mennestens fönnef Pond Salz jestraut! Su ene Saukeer! Su ene Zänkstevvel! Su ene...! De Deuvel soll en holle!

De Deuvel holt en ävve net. Vell schlemme: de andere Morje woor et am rähne vom Himmel hoch, un hä hatt seng Salz, et Pond füür aach Pänning, janz füür ömmesöss jestraut.

Denkt ens: vier Jrosche vüür nix un wedde nix op de Strooß jeschmesse! Dä Pete! Dä Schööthots Pete! Dä wäjen drei Rieskörnche et Spölwasse dorech de Seih däht schödde!

„Nä, wat hätt mich usse Herrjott je- stroof!“ sähte, „Un alles wäjen dä Sau- pänz!“

Eie lääje

Me möht eijentlich ens nohluure, wat et all övve Eie ze saage jitt un alles, wat domet zesammehänk, ovv et Höhneeie, Enteeie, Kibitzeie ode andere senn, ov se jekoch, jebacke, alleen ode met jet andesch senn, en ruude Wing jeschlaage, ze Ostere ode Pingsde zezäächje- maht, wat me em Sprichwoord all met ode övve se saage kann. Ich hann joh ene schlaue Booch, wo ene Deel Zeuch

drennsteht, wie se helepe, wemme je-
sond ess ode krank un esu, ävve dat
wollt e jetz net wesse, nä ne?

Och net, wat ich ussem Jriet für en
Antwort hann jejavve, wie et mich,
wie ich esu en aach, nöng Johr alt woor
un it en fönnef, sechs, frooge dächt:
„Wie mereken die Höhne, wenn se e Ei
lääje mösse?“ Och net? – Dann doht et
roode.

Dat alsu Vühel Eie lääje, die me esse
kann, un dat me dofür et bess Höhne
deht haale, am Äng och ene Hahn für de
Eie ze stempele, wesse me.

Un wemme selevs kenn Höhne hätt,
jeht me en e Jeschäff un kööf ere esu
vell, wie me hann well, ode de Eiemann
kütt lans de Dörre, eemohl de Woch, et
janze Johr övve.

Dat woor net emme su. De Motte dächt
fröte de Somme övve, wenn net ze vell
Höhne klotzich wooren un et düchtich
Eie joov, deren en dressich, vierzich en
e jruuß Döppe ennlääje, die dann Soleie
heesche dähten. Un wenn ere dann
doch en etliche dovon net mieh jood
wooren, wenn se Chressdaach Kooche
wool backe, dann konnt se su enn
Rasch jeroode, dat se donoh seleve säht:
„Jetz moß ich iersch vüür Chressdaach
noch wedde bichte jonn.“

Un jetz denkt ens an die Zegg – wenne
se noch erlävvt hadd –, wie et em un
noh em Kreech bloß noch op Kaate Eie
joov, zeggwies de Moond bloß noch
eent ode zwei de Mann, un wie, wer
Höhne hatt, Eie avv moht levvere, wen-
ne mieh wie drei Höhne hatt. Froocht
mich, wovon die jeföödet wuurten.

Su. Nu weßde, ode weßt wedde, wat e
Ei jet Raresch woor un e Jeschenk, met
däm de dich om Namensdaach ode am
Krankebett sehe konns losse.

Un de Wellemche hätt, vellech noch als
Nohkaate vom Kreech en Rußland,
Ängs Merz ene saumäßige Rheumetis-
mes erwisch un muß em Bett lieje. Dat
ess em jar net rääch, ierschdens, weile
fies Peng uss moß haale, zwättens, weile
wochelang net noh Bonn kann fahre
studiere, un drettens un alldeschlemms:
hä hätt Fasteloovend ahnjefange ze kar-
ressiere. Un nu konnte joh net nohm
Kommoovend jonn, wer weeß wie lang.
Ävve hä hätt, vüür e paar Daach, wenn
och jet kraakelich, e Breefje jeschrevve,
un nu ess et enn besöhke jekomme.


Weil och noch e paar Quäss von de
Pfarrjugend doh senn, widd trotz Peng
jekalevet un jelaach. Wie et schellt un de
Wellemche hüürt, dat ongen de Motte
an de Düür jeth, rööfe, weile Duesch
hätt, de Motte für jet ze drinke.

„Komm“, säht et Marijännche, „dat
kann ich de holle jonn, dofüür bruch de
Motte not erop ze komme, die muß esu
jenooch Treppe loofe. – Wat wells de ze
drinke hann?“

Et jeht alsu erav, e Ilas ze drinke holle.
Derwiel kütt de Wolefjang erop op Be-
such un hätt von deheem e fresch Höh-
neei metjebraht. „Hann ich jrad uss
dem Stall jehollt!“ sähte. Verhafftich,
me meent, et wöör noch wärem.

De Wellemche nimmp et met Danke-
schön en de Hand un kakelt wie e Hohn
– dat kanne jood, esu jood, datte de
Hahne domet op kann rääje –, un läht et
nävvnen sich esu, dat de Bettdeck drövvne
fällt. Un weil die andere övve dat Kaa-
kele laache, kakelte noch mieh un noch
laute. Dodrövvne kütt et Mariännche
erop un hätt e Jlas Himbeersaff.

„Heh“, säht et, „der schmeck!“ – Un
schöddelt de Kopp wäjen däm Kaakele
un säht: „Komm, hüür op un streng
dich net esu ahn. Du kanns joh doch
kenn Eie lääje.“



Doh bletz et beim Wellemche, dä trotz
Peng emme noch ene Filuh jeblevve ess.
Hä kakelt noch mieh, noch hääde, wag-
gelt em Bett eröm, vedriecht et Jeseech,
pack met de Hand onge de Bettdeck,
fupp een-, zweimohl e besje huh, trick
de Hand onge de Bettdeck eruss un hält
dem Mariännche en de flache Hand dat
Ei onge de Nas.

Dat maht Ooge, su jruuß wie Möllrää-
de, övve se Jeseech wolle me net kalle,
ävve me merek em ahn, dat et noch wie
vürrem aachde Weltwonde steht. Un
noh ene haleve Menutt fangen die drei
Quäss, die och ene Oogenbleck veduzt
jeluurt hann, ahn ze laache, dat de Fen-
steschieve waggele.

Vellech hätt et Marijännche e paar Se-
kunde wercklich jemeent, de Wellem-
che könnt Eie lääje. Et weeß et seleve
net mieh. Un et schönste ess: wie die
drei endlich saage könne zweschem
Laache, wie dat Ei onge die Bettdeck
jekomme ess, doh laach et genau esu
hadd en esu lang wie die Quäss.

Ühr konnt et frooge. Et hätt senge Wel-
lemche jehieroot.

Un och de Wolefjang konnde frooge,
dat ich ussnahmswies ens de Wohrheet
hann vezallt.

Peerd beschlaage

De Italjäne Pette ess an de Kuhl am Knolle lade. Me hüürt en zakramentiere wie ene Kermeskeerl. Hä hätt beim Draut seche wedde jestuuvte Schafuur krääch. Dän maache net. „Isse Tätsch! Maache liebe Salata!“ schreite dann. Deswäjen vezillt et Draut: „Däm könnt ich uss Kraadebeen Schloot maache. Dat frööß dä noch!“

Wat wohl ich dann ovvehaup vezälle?

Ah su: Dat me de Pitte von de Knollekuhl her hüürt.

Die litt op de Weed en de Eck von de Veehjass un de Duueschjass. Doh kamme des Oovens fein vesteche spelle.

Me möht ens schnell die hondet Schrett dohin loofe un luure, wat de Pette wedde hätt. Entwede senn zevell fuhle Knolle drenn, dann bliht me et bess wegg jenooch fott, esu schmieße die dann eröm. Ode hä hätt sich an de Kaar jestuufse, dann tritte un kloppe dodrahn eröm, ode et Peerd ess em wedde net rühich jenooch stonn jeblevve un wohl sich nävve de Kuhl en Muhl voll Foode krieje, jezz em Fröhjohr esu richtich saftich un voll Kätteplöck. Dann kritt dat ärem Dier se wedde mem Jaffelstell ode esu jar e paar Trett vüür de Hästere. De Pette kann arbeede füür drei, ävve wenn em de Wut en de Ooge schläht, ess nix vüür em seche.

Wie me vüür de Düür komme, kütt de Pette att en de Veehjass jeschwenk, de Jaffel op de Scholde, de Züjele en de Hand. Hengerher kütt et Ella jetrott, met de Knollekaar. De Kopp löht dat Dier beim Träcke emme jet hange, ävve et tritt andesch op wie söss.

Un wie et vüür de Strooßbahnschenne op et Flaste kütt, hüürt meret, wat loss ess: klapp-klipp-klapp-klapp maht et! Dat Dier hätt bloß noch drei Iese ahn! Ov et dat eene vüür de Knollekuhl ve-loore hätt? Ens luure koss joh nix. Richtichewäch! Doh litt dat een Hoo-fiese! Zwei Nääjel senn esu jar noch dren.

Doh frooge me de Leuet, ov me dat behaale dörfe.

Au joh! Un dann moß doch eene von dänne moorn ode övve moorn dat Ella neu beschlaage losse, hoffentlich et Nommetaachs!

Me können joh att ens luure jonn. En de Schmedd woore me joh lang net mieh. Äss wenn seret jeroche hätt, kütt de Oma un bruch ene neue Blechtrichte füür ihr Säffje un Tingtuure uss Johaneskrock un Arnika, uss Wäächtrett un Schääch en Fläschelche avvzefölle, weil de ahle kenne Henkel mieh hätt, un de Seih hätt ere noch eene, ävve dä waggelt och att. „Komm Jong“, säht se, „dä

ärme Zortier hüürt me op. Jank me en neu lüüse.“

Wie de Motte dat hüürt, dat me nohm Reifenhäuse jonn, rööf se: „Waat ens ene Schlaach, de Papp hätt doch heh ene Zeddel lieje!“

Ah joh! Doh steht drop, datte e halef Pond andethalevzöllije Nääjel bruch. Die senn füür et Rejahl, watte em Kelle am baue ess füür de Äppel un Berre drop ze läaje. Ahl kromm Nääjel jraad-zekloppe hätte kenn Loss mieh. Dobei hätte sich zeletz e paarmohl fies op de Fengere jeklopp, un ich hann ere e paar en de Nacke krääch, weil ich dobei esu dreckelich jelaach hann. Un de Motte seleve bruch ene neue Thermomete füür de Ennkochkessel un zwei Dotzend Jummireng füür de Ennmaachjläase.

„Velier et Jeld net!“ kriejen ich noch nohjeroofe.

Jraad, wie me beim Dalmes Täübche noch jet Klimpemännche spelle wolle, kütt jäjenövve de Leuet, senge Zijaareknävvel en de Muhl, am Hoff eraus un jeht op et Ovvedörep ahn. Ov der och att nohm Reifenhäuse noh de Schmedd jeht? Senge Kohrn drinke doch mirschdens beim Hohns Billa, un net jetz, am Nommetaach. Wenne noh de Jass wöhl, nöhme et Radd, wenn et janz wöör. Un nohm Pool nohm Duur welle hüek seche net, met däm hätte Knies.

Alsu mösse me noch jet tröödele, bes me wesse, wo e hin well. Wie mer en esu jar jrööße, sähte och de Daachs-zegg, knoorz ävve hengeheer: „Modde wedde eröm labbesse? Hadde kenn Aufjaab op?“

Dat moß der jraad frooge, wo me vom Ohm Will, met däm e en de Scholl woor, wesse, datte seleve de halef Zegg jar keen ode de vekiehrte Aufjaab hatt. Ävve richtich, hä jeht en dä breede Ennjang henge de Laadetrapp erenn. Mir könne also rühich die fönnef Stufe eroptappe un de Laadedüür opmaache. Räächs donävve ess e Fenste, ävve Schaufenste kanns de dofüür net saage. Dofüür ess an de Düür de schönste Bimmel em janze Dörep. Net ens dem Ossendorfs Hein de seng ess esu schön. Heh die mäht nämlich net bloß bimelebim, nä, wenn de se fess jenooch zweimohl hin un her wäächs, mäht se pirrirr-bimelebimelebimlepplepp.

De Lade ess net jruuß un net schön, en einfache Holzthek un an drei Wäng Holzrejale, rüh Holz ode met Foßboddemfärrev jestreche, un övveall Jescherr drenn, wat me uss Iese, Blech, Jlas un ierde Zeuch zo der Zegg en enem Dörps Huus bruch.

Et duurt emme lang, bess de Frau Reifenhäuse kütt. Männechmohl meent me, et wöör övvehaup kenne doh. Ävve wenn se ovenop woor, kann et joh jet duure.

lüüse – lösen, kaufen

Hästere – Hachsen

labbesse – Unfug treiben

Schääch – Schachtelhalm

Se ess en schweer Frau un kütt eenem met ihrem dunkele Rock un ene dunkele, jestriefte Lengeschötzel ganz erns un streng vüür, un dobei hätt se tausend Sommesprosse em Jeseech un richtige Laachfäälche an de Ooge. Un reche-ne kann die! Un e Vezällche haale deht se och, un, – denkt ens – enem Iesejeschäff jitt et Kamelle!

„Saht, Frau Reifenhäuse, dörfe me ens en de Schmedd jonn?“ frooge me, „Ens luure, ov e Peerd beschlaage widd? Ode jett de Bloosballech trække?“ „Joht ens ussen eröm“, säht se, „froocht ävve iersch menge Mann, un stoht net un-nühdich en de Wääch eröm!“

Nu moß ich iersch ens ierhlich senn: meent Ühr, ich wöß noch füür jeweiß, ov die Frau Reifenhäuse esu jesproche hätt? Ov die övvehaup Droosdorve Platt konnt? Ode am Äng us dem Westfälische woor? Ich könnt joh ens eene von ihre Quäss frooge. Dat werden ich diss Daach och donn.

Me jonn alsu dorech de Ladendüür – bellebellebem – die Stufen erav un noh links en dä breede, düstere Jang. Düste, wiewahl de janzen Daach de Poorz opsteht.

E Peerd ess kennt doh, ävve lang kann et noch net her senn, dat ere eent beschlaage ess wuurde, et rüch noch noh verbrannt Hoorn, et liejen noch Spöön op de Eerd eröm un et steht noch e Pöölche Piss zweschen de Steen un stink esu söößlich.

An de Stiernwand steht allehand Jescherr füür ze repariere, ävve de Hauptwerekstatt ess noh links hengerem Huus. Doh steht de Amboss, en Bött met Wasse, e paar Rejale un Jestelle met Werekzüch, Schruuve, Avfallstöcke. Un hengen schrääch en de Eck füür uns et wichtichste: et Füür mem Bloosballech dronge. Dat Füür ess eijentlich blos ene jruuße Desch uss Iese, en de Medde ene kleene Rost, wat me ävve net sieht, weil Jloot, nur noch e besje Jloot, un Äsch un Kolle droplitt, links dovon ene jruuße Hoofe Kolle, räächs Zange, Hamme-re, och an de Wand. Dodrövv rieß ene jruußmächtije Roochfang de Muhl op, die ganz en et Düstere jeht. Me kann de Kopp vedrähe wie me well, me süht kee Äng. Un doh rüch et noh Kolle un Rooch un Ieseschlaach. Doh kütt och de Vatte Reifenhäuse, ene schwere Keerl, wie sich dat füür ene Schmedd jehüürt. Hä hätt kenn Kapp ahn, hä woor seche jraad em Huus, un wösch sich de Häng onge dä schwere Schötzel uss Lädde avv. De Maue hätte halev eropjekrempelt. Dä hätt an de Ongeärem mieh Muskele, wie de Vatte an de Mau.

„Ah, ihr Trabante“, sähte, „wat jitt et? Wells de ens mem decke Hamme klop-

pe?“ Domet hann ich dön och att en de Häng. Ävve ich kriejen dön met Möh un Nuut bes op de Amboss jehovve. Von wejen kloppe!

De Reifenhäuse laach.

Also esse jood jedonn, un me können en frooge. „Dörve me ens de Bloosballech trække?“ – „Waat ene Schlaach, de Karel ess jraad en de Duuvejass en Kaar holle, doh mösse neu Naabiese drop. Dann könnde trække.“

„Herr Reifenhäuse, ävven hätt et Hoffs Ella e Iese veloore. Woor de Italjäne Pitte att heh?“

„Ija, Ävve der moß noch waade bes haleve sechs!“

„Au, jood! Dann komme me dann noch ens wedde!“

Beim Fußballspelle jeht de Zegg flöck eröm. Dann tappe me hengerem Pette her. Füür drei Eckstein nimmpe uns esu jar met.

Dat Peerd moß hengeröcks en dä Jang jeleed werde. De Karel nimmpe e neu Iese von de Wand, tritt dem Ella leech vüür de Hoof, dat hiff de Fooß e besje, un doh kann de Karel et Iese ahnmesse. Hä moß e anderet nämme, dat ess en Numme ze kleen.

Dann schmieße et richtige en et Füür, nimmpe en Zang un deut domet jet em Füür eröm, nimmpe et Ieseschäufelche, schäpp zweimohl Kolle op de Jloot un deut met de Zang dat Iese dozwesche.

„Los, jett fess jetrocke!“ sähte un дәüt eenem von uns дә Iesebüjel en de Hand. Weil meret extra jood maache wolle, trække me esu fess wie et jeht. „Heh“, säht de Karel, „net esu hastich, ühr brudd net de Kamin ze stoche! Un süch: Wie me schön jleichmäßich trække, widd et em Füürche iersch ruud, dann wieß, un nur ganz wennich Rooch trick en de Hüh.“

En kohm drei Menutte ess dat Iese ruutjlohlich, un de Karel pack et met de Zang, lääch et op de Amboss un klopp drop eröm, emme drei leechte Schlääch op de Amboss, ene schwere op et Iese un eene op de Amboss un eene op et Iese un wedde drei leechte. Me дәhten jern frooge, wat un woröm datte klopp, ävve jett mösse me en de Jang jonn.

Doh steht nämlich de Italjäne Pitte, hätt dat räächde Hengebeen vom Ella, an дәm дәt Hoofiese fählt, en de veschränkte Häng. De Reifenhäuse hätt de Brell op de Stiern jehovve, sich an дә Hoof jeböck, un deht met enem jruuße, scharfe Schaaviese дә Hoof beschnegge. Wie e rööf, kütt de Karel met дәm noch heeße Iese, de Reifenhäuse nimmpe och en Zang, en jet kleenere, un deht dat Iese su op дә Hoof lääje, dat die Krämp noh ovven nohm Been zoh ze lieje kütt. Et qualemp jet, et rüch scharrev noh verbrannt Hoorn, ävver et Ella bliest räuhich stonn.

Dann kommen die viereckige lange Hoofnägel drenn, dä Hoof widd fein schwazz jewichs, un de Pette kann losslosse.

„Su“, säht de Reifenhäuse, „nu loss me die andere Hoof och noch nohluure.“ Do jeht de Pitte op de andere Segg, stüüß mem Fooß däm Ella se ande Hengebeen ahn un hivv et huh.

Dobei drähte sich em Böcke jet ärech weg mem Hengesch ongeret Ella. Wie sich die zwei, de Reifenhäuse un de Pitte, em Böcke eenich senn, dat doh och ene Näjel loss ess, hivv et Ella de Stätz un löht e paar Äppel falle, dem Pitte jrad op et Kreuz.

Eene davon blieht wahl drei Häzschlääch lang doh lieje.

De Reifenhäuse riß de Ooge op un platz uss füür Laache, dat em de Brell op de Naas rötsch, mir laachen och knochehadd.



Wat meend e, wat me se vom Pitte jeschannt hätten krääch, wenn net och de Reifenhäuse jelaach hätt! Su jitt sich de Pitte blos mem Peerd an et schänge: „Du vedampfte Sau! Ich trete all Knochen kaputt! Hau dich Knüppel in Schnauze!“ –

Wie vier Woche späade et Hohns Jeloog Stiftungsfess hätt, widd de Pitte füür zehnjährige Mitgliedschaff jeehrt.

Un hä kritt e fein Spröchelche opjesaht:

Röddels de am Appelboom,
wenn de dronge stehs,
fallen der e op de Kopp,
wenn de fott net jehs.

Äppel jitt et och vom Peerd.
Wer sich dronge böck,
wie de Pitte et jedonn,
kridd se op de Röck.

Heh dä Köttel, präpariert,
häng de öm de Hals.
Hondet, wenn d'en sächsich drehs,
wisd jedenfalls.

Pennche kloppe

Me moß jenooh Plaaz hann un wenichstens e kleen Eckelche Erd füre Kühlche ze kratze. Rond ön sich maht me ne Schroh, su wegg, wie me met de Ziespetze reck, un genau metzen en dä Krees kratz me mem Penn et Kühlche, zwei Handbreet lang, drei Fingere deef, zwei Fingere breet.

Queer metzen drövv kütt et Pennche ze lieje. Dat moß me en de Länge zwesche Domespetz un Meddelfenge hale könne. Et söhl joot domedeck, us haadem Holz un an beeze Änge ejal esu ahnjespetz senn, dat de Spetze net avbräche, wemme drop klopp, ävve och net ze kuurt, söss fupp et net.

Vom sälevije Holz wie et Pennche mäht me de Penn, dobbelt esu lang wie von de Fengespetz bes an de Ellebooge, et deckste Äng für anzepacke, et dönnere jlatt avjeschnegge un schräch op et Äng ahn jett plattjeschnibbelt wie en Katzezong.

Op „Paar“ ode „Unpaar“ stellt sich een Volek mem irschte Klöppe en de Krees, die andere dohenger, wennere mieh dohsenn. Et andere Volek stellt sich vüren Krees esu op, dat mer, wenn müehlich, et Pennche schnappe kann.

Dat kütt nämlich jlich ze fleeje. De Klöppe stipp de Penn met de Zong ongeret Pennche en et Kühlche un wipp dann et Pennche en de Hüh. Wemme fass jenooh en et Kühlche jedauht hät un joot metzen ongerem Pennche, schnöcks dat esu faß huh, dat et mänehmohls en zwanzich, dressich un mieh Schrett wegg flüch, huh ode flach.

Hätt et eene vom Unpaarvolek jeschnapp, ier dat et op de Erd es komme, moß de Klöppe de Penn quer övveret Kühlche läaje un op Segge jonn. De Schnappe darf von der Plaaz ahn, wore et Pennche jeschnapp hätt, met Ahnloof drei Schrett op de Krees ahn spreng, stonn blieve, et Pennche – et bäss us de flache Hand – en de Krees schmiefse, och flach övve de Erd jeschörvelt, datte de Penn triff. Dann wite selve Klöppe, un et Paarvolek moß schnappe jonn.


Wurt et Pennche net jeschnapp, moß de nööchste von dä Plaaz uus, wo et zeletz stell liejen es blevve – me darf et nämlich op de Krees ahn trädde, sulang wie et noch schibbelt –, vesöoke, overet en de Krees jeschmesse kritt, ohn dat et ahn de Schroh stüüß. Dat es net leech. Em Krees steht de Klöppe mem Penn un pass op, un schleet et, sulang et wääch, wegg jenooh fott. Kütte met de Fööß dran, esse janz us em Spell eraus. Blieht

et Pennche em Krees lieje, witt jewerselt.

Nu es et ävve drusse lieje blevve. Jetz moß de Klöppe seng Kuns zeje. Dreimohl darfe mem Penn op en Spetz vom Pennche kloppe – jetroffe un jefupp ode net, zällt jlich – un et, wenn et fupp, us de Luff fottschlaage – net en de Krees, dann esse av. Wenne jehürrich triff, flüch et Pennche Jott weesß wie weg. Och dobei daref et andere Volek schnappe, dann zällt et nix un de Kloppe es av.

Dann woor de Spillesse Hannes drahn un schlooch et Pennche bes en de Kall vom Röttchens Muhr. Se mohten de Leede holle, bes se et wedde eruujsjesch hatten.

Un dann wuurd sich tispetiert, wo et lieje möht für weggekloppe. De ahl Kelleschhohns Möhn stoch de Kopp am Fenste eruuß un schannt: „Ühr vedammte Saupänz, modde su ene Krach maache, munge Hein kann net rählich lieje!“



Von doh ahn, wo et Pennche nohm drette Schlaach lieje bliet, werden de Schrett op de Krees ahn jezallt. Wenije wie eene Fooß zällt nix. Jede Klöppe darf esu lang schmieße, besse av ode druus es.

Hätt ee Volek all Klöppe druuß, es et velorre. Dat Volek, wat et iersch dau-send Schrett hätt, jewennt.

Dobei jeht et männechmohls net ohn Jezänks, Jeschrei un Klopperei av. Bei ussen Spell woren at en ganze Heerd Löck stonn blevve. En Deel vestonten jet dovon, andere schöddelten mem Kopp.

De Schenkelberchs Jerred wor at esu bletzlich, datte sengem Hannes e paar henge de Uhre joov, wie der et Pennche seleve en de Krees schlooch. „Du Dä-mel, kannste net kürte op de Spetz kloppe? Du bes ze domm für mem Äsel ze danze, wemme de de Stätz en de Hand jitt!“ schannte un konnt sich net mieh enkrieje.

Et joov eneus Spell, wie de Hannes em Booge op de Krees ahn zallt statt strack jraaduuß. Ävve et alldeschlemms wuurd et, wie se sich net eenich wuurten, ov dat lätzte Stöckche ne Fooß wör ode net. De Bruudässesch Jüpp stalt sich met senge Schoche drop. „Heh, luurt, dat es ze wennich!“ „Joh du met denge Jraubruutsföß, du pass joh net dorech de Abtrettsdüür!“ schannt de Hannes. Paaf! Kräättere vom Jüpp eene op e Uhr. Dä hatt de Penn noch en de Häng un schlooch drop, krääch selevs vom Büchels Aujuss ne Trett en de Hengesch, un dann woß kee Minsch mieh, wer sich met wemm am kloppe woor.

En halev Dotzend Ahle sprongen dotö-sche, kloppten iersch op de Pänz loss un kräächten sich dann selvs en de Woll.

Des Ovens schöddelten se seleve mem Kopp. Näh, wie kamme nur esu doll senn! Ävve alles, wat rääch es, die Quäss konne Pennche kloppe, esu jood bahl wie mir für en dressich Johr!